

Naalackersuisut attartornermut peqqussutip allannguuteqartinnissaat, ineqarnermut akiliineq bankip qaammatini ulloq kingulleq ammaffianut nuunnissaanut aalajangiiffigisassatut siunnersuut.

(Inatsisartuni ilaasortaq Justus Hansen, Demokraatit)

Akissuteqaat

(Ineqarnermut, Sanaartornermut Attaveqaqatigiinnermullu Naalackersuisoq)

Siullermeerneqarnera

Naalackersuisunit siunnersuummut pitsaasumut tunngavilersorluakkamullu, attartortut piffissaq eqqorlugu ineqarnermut akiligassaminnik akiliisarnissaannut qulakkeerisussamut, aammalu pisortanut akiitsut akilinngitsuukkat ikilinerinut pisooqataasinnaasumut qujavugut.

Naalackersuisunit akiitsut akiitsunillu akilersuisarnermut nassuiaammik suliaqarput. Nassuiaammi ilaatigut ineqarneq, tassungalu ineqarnermut akiliutinut akiitsut akilinngitsuukkat, akissarsiat tunniunneqartarnerat kiisalu pisortanut akiitsut ilanngullugit allaaserineqarput.

Nassuiaasiaat suleqatigiissitami, ilaatigut INI A/S-imit, Iserit A/S-imit, Akileraartarnermut Aqutsisoqarfimmit, KANUKOKA-mit, aningaaserivinnit, akiliisitsiniartartunit kommuninilu sullissisunit peqataaffigineqartumi suliarineqarpoq.

Nassuiaat soqutiginaateqarpoq, tassanimi ilaatigut innuttaasut akileerusussuseqartut, kisiannili akiliisinnaassuseqanngitsut allaaserineqarput. Innuttaasut taakku pisortanut akiitsuminnik akiliisarnissaat qulakkeerniarlugu qanoq iliortoqarsinnaanersoq allaaserineqarpoq. Naalackersuisut isumaat malillugu siunnersuummi matumani ajornartorsiutit, akiitsut akiitsunillu akilersuisarnermut nassuiaat oqallisigineqalerpat ilanngullugit oqallisigineqartussat kalluarneqartussaapput. Nassuiaatip suliarineqarneranut atatillugu assigiinngitsunik inassuteqaateqartoqassaaq.

Taamaattumik siunnersuummi pitsaasumi matumani Nassuiaatip suliarineqarnerani attartornermut inatsimmut ilanngussinissaq utaqqineqassasoq siunnersuutigineqarpoq, tassani pissutsit arlallit, innuttaasut akiitsuisa akilinngitsuukkat amerlinnginnissaat ajornanngippallu akiitsut apparnissaat qulakkeerniarlugu allanngortinneqarsinnaammata.

Matuma siuliani oqaaseqaatit tunngavigalugit Naalackersuisut inassutigaat, matumani siunnersuut taparserneqassanngitsoq, kisiannili akiitsunik ajornartorsiuteqarnerup suliarineqaqqinnerani annertunerusumik suliarineqarnissaanut ilaatinneqassasoq